

Aldaia aske

Bahitzaileek beti toki berean eduki zutela esan du Aldaiak

Gomez de Liaño epailearen aurrean deklaratu zuen Irunen

Aldaiak bahituta izan zen bitartean beti toki berean eduki zutela eta ez zutela inora atera deklaratu zuen atzo Irungo epaitegian Entzutegi Nazionaletik etorritako epailearen aurrean. Bera aske uztearen truke ordaindu duten ez dakiela adierazi zion epaileari.

Axun Erzibengoa / Irun

ORDU eta erdiz deklaratu zuen Jose Maria Aldaia enpresariak Entzutegi Nazionaletik Irungo epaitegira etorri ziren Javier Gomez de Liaño epailearen eta Ignacio Gordillo fiskalaren aurrean. Sei folio bete zituen deklarazioa «zabala eta ikerketarako interesgarria» jo zuten aipatu iturriek eta ikerketek aurrera egingo dutela adierazi zuten.

Bahiketak iraun zuen bitartean beti toki berean eduki zutela deklaratu zuen Aldaiak, ez zela ezertarako atera gatibu zegoen «zulotik». Kanpoko aldearekin inolako harremanik ez duela izan adierazi zuen halaber. Aldaiak bahiketaren 341 egunak kontatu zizkion epaileari eta epe honetan beti jakin izan zuen zein egunetan bizi zen, deklarazioan esan zuenez. Jatorduei esker jakiten zuen eguna noiz hasi eta noiz amaitzen zen.

Erreskatearen inguruan Aldi-transeko buruak epaileari esan zion, ez dakiela bere askatasuna lortzeko ordainketarik izan den ala ez. Bahiketan parte hartu zuten hiru lagunak eta ondorengo hilabeteetan izan duen zaindaria ez lituzkeela ezagutuko deklaratu zuen Aldaiak, izan ere guztiek «aurpegia estalita izan zuten uneoro».

Epailea Madrildik Irunera • Hasieran epaileak Madrilen deklaratzera deitu zituen Jose Maria Aldaia eta bahiketan zehar bozeramaile lanak egin zituzten Francisco Audela eta Inaxio Altuna. Audelak eta Altunak hain zuzen, herenegun deklaratu zuten Entzutegi Nazionalen Gomez de Liaño epailearen aurrean. Irungo epaitegiko forenseek astehenean Aldaiari eginiko azterketaren ostean ez zuten egoki ikusi Aldaiak Madrilerako bidala egitea eta horregatik etorri ziren epailea eta fiskala Irunera.

Deklarazioa atzo eguerdirako iragarrita zegoen arren, ordu erdi lehenago iritsi zen Aldaia epaitegira. Ertzaintzaren auto batean iritsi zen bere lehengusu Francisco Audelak lagundurik. Kazetari ugari zeuden sarreran, baina autoa zuzenean sartu zen garajera eta gutxi batzuek bakarrik ikusi ahal izan zuten, garajeko atea ixten ari zen bitartean atera baitzen Aldaia kotxetik.

Deklaratzen hasi aurretik Entzutegi Nazionaletik etorritako forense batek eta Irungo instrukzio epaitegiko beste batek ikusi zuten. Iturri judizialek adierazi zuten, forenseek osasuntsu ikusi zuten, baina badaezpada aurrean izan ziren Aldaiak deklaratu zuen bitartean. Hala eta

guztiz ere, epailearen aurrean azalpenak eman zituen bitartean «argi» egon zela adierazi zuten iturri judizialek.

Epailea eta fiskala, goizeko 11.20ak inguruan iritsi ziren Irungo epaitegira. Aldaia askatu zutenetik gertatu den bezala, atzo ere kazetari ugari pilatu ziren Irungo epaitegiaren aurrean. Korrikaldirik ere izan zen, izan ere Aldaia deklaratzeko ari zen bitartean bi aldiz ireki zuten garajeko atea eta irtetera zihoana nor zen jakiterik ez zegoenez, argazkilari, telebistako kamera eta kazetariak garajeko atean pilatu ziren nor irteten zen ikusteko. Azkenean 14.20ak aldera irten zen Aldaia garajetik Ertzaintzaren autoan. X



Javier Gomez de Liaño epailea eta Ignacio Gordillo fiskala Irungo epaitegitik ateratzen, Aldaiari deklarazioa hartu ostean.

EDURNE KOCH

Audela eta Altuna Madrilen

INAXIO ALTUNA eta Francisco Audela, Jose Maria Aldaiaren bozeramaileak, Madrilen izan ziren herenegun Javier Lopez Liaño Auzitegi Nazionalen epailearen aurrean deklaratzeko. Ordubete iraun zuen galdeketa Altunak eta Audelak esan zuten Aldaiaren familiak ez duela ezin erreskaterik ordaindu Oiarzungo enpresariaren askatasuna lortzeko.

Iturri juridikoek jakinarazi dutenez, Javier Lopez Liaño epaileak Ignacio Altuna galdeketa izan zuen lehenbizi. Aldaia familiaren bozeramaileak azaldu zuenez, berak Aldaiatarrei «laguntza izpirituale» eskaini besterik ez duela egin. Ildo horretan, erabat ukatu zuten erreskatearen balizko ordainketa batean esku hartu duela. Agertu zuenez, berak ez daki enpresari oiarzuarren familiak ondasunak saldu edo hipotekatu dituenentz hilabete hauetan. Altunak agertu zion epaileari posible dela ETAK enpresaria askatu izana «nekatuta» zeudelako hainbeste hilabete beren esku izan ondoren.

Bestalde, hilabete hauetan Aldi-transeko kudeaketaz arduratu den Francisco Audela, Jose Maria Aldaiaren lehengusua, bat etorri zen Altunaren bertsioarekin. Audelak uste du ETAK Aldaia askatu duela «arrazoi politiko konplexuak» direla-eta. Aldaiaren lehengusuak esan zuen ez duela inolako harremanik izan Herri Batasunarekin edo ETArekin erreskatearen ordainketa zehazteko xedearekin. Halaber, ukatu egin zuen Iparraldera joana kontaktatu horiek zirela-eta, eta ziurtatu zuen ez dakiela bahitu baino lehen Aldaiak ETArekin gutunik jaso zuen dirua eskatuz.

Audelak argitu zuenez, bahiketaren iraun duen bitartean Aldi-trans kudeatzeaz arduratu da, enpresako kide delako. Ildohorretan, Audelak esan zuen Aldaiaren beraren bulegoan izan dela lanean. Eta adierazi zuen, gestore den aldetik, ez duela ondasunik saldu edo hipotekatu, eta erreskateari buruz komunikabideetan esan dena baino ez dakiela aitortu zuten.

TXIKIMAX

EZAUGARRIAK: 1/2 orduko
2 emanaldi.

BEHARREZKOA: Argindar hartunea.
Enparantza edo areto txikia.
4-10 urteko haurrentzat.

HARREMAN eta KONTRATUAK: Euskaldunon Egunkaria.
Tel.: (943) 30 02 22
Faxa: (943) 300707

PREZIOA: 95.000 + BEZ.

Egunkaria ren TXOTXONGILOAK